

Script of Morning Gojri News Bulletin 30 August 2024 at 1015Hrs

ما رنینگ گو جری نیو ز بلیٹن مو رخہ 30 اگست 2024

یوہ آکا شوانی جموں بے محبوب سلطانی تیں خبر سُنو۔

MCC Enforcement Agencies

جموں کشمیر قانون ساز اسمبلی گا انتخابات واسطے اعلان کرن آلی تا ریخ توں بعد بُن توڑی بکھ بکھ ایجنسیاں نے 5 عشاریہ 71 کروڑ روپیہ غی مالیت غو سامان ضبط کیو بے جن مانہ کجھ نقد رقم، منشیات، تے شراب شامل بے۔ اس ضمن مانہ پولیس محکمہ نے 5 عشاریہ 2 کروڑ روپیاں غی مالیت مانہ ضبط کیو جد کہ ایس جی سی ٹی تے این سی بی نے بالترتیب 52 لکھ تے 11 لکھ غی مالیت آلا سامان مانہ ضبط کیو بے۔ اس ضمن مانہ انتخابی محکمہ نے قانون نافذ کرن آلاں اداراں غی کو ششیاں غی تعریف کی بے۔ تانجے یوٹی مانہ اسمبلی انتخابات صاف و شفاف طریقہ سنگ منعقد کران مانہ یقینی بنایو جاسکے۔ اس ضمن مانہ چناؤ متعلق کا کر دگی تے مثالیضابطہ اخلاق غی تعمیل با رے جموں تے سرینگر مانہ اعلیٰ چناؤ افسر غا دفتر اندر کنٹرول روم قائم کیو جا ریو بے۔

Div Com Jammu

صوبائی کمشنر جموں رومیش کمار نے پچھلے تہاڑے ڈی سی دفتر کا نفرنس حال ڈوڈہ مانہ اک اعلیٰ سطحی میٹنگ غی صدارت کر غے ضلع مانہ قانون ساز اسمبلی 2024 غا انتخابات با رے تیاریاں غو جائزولیو۔ اس دوران اُنہاں نے پولینگ کران آلا عملہ بارے نقل و حمل غو منصوبو، ای وی ایم مانہ پولینگ منعقد ہون توں بعد متعلقہ سٹور روم مانہ رکھن تیں علا وہ دیگر تمام ضروری چیزاں بارے جانکا ری حاصل کی۔ اس ضمن مانہ ضلع چناؤ افسر بر ویندر سنگھ نے جانکا ری دتی جے تمام تر پولینگ سٹیشناں ور بر ممکن سہولیات مانہ یقینی بنایو گیو بے۔ اس تیں علا وہ جدید طرز ور مبنی پولینگ سٹیشناں غو قیام وی کیو گیو بے۔ صوبائی کمشنر نے تمام نوڈل افسراں عہدیداراں مانہ کہیو جے چناوی عمل غے دوران پیش آن آلی دقتاں مانہ حل کرن واسطے ہمیشہ تیار رہیں۔

Chief Secretary

چیف سیکریٹری اتل ڈلو نے پچھلے تہاڑے جموں کشمیر آیوش سو سائٹی تے قومی آیوش مشن غی اک اعلیٰ سطحی میٹنگ غی صدارت کی۔ جس غو مقصد سالانہ ایکشن منصوبہ 25/2024 نانہ منظوری دینوتھو۔ اس دوران چیف سیکریٹری نے محکمہ نانہ کہیو جے ویں بکھ بکھ ذرائع توں آیوش غی فلاح و بہبود با رے پوری کوشش کریں۔ انہاں نے نجی عملہ غی حوصلہ افزائی کرن با رے وی کہیو تے اس ضمن مانہ انہاں غو مزید کہنو تھو جے یوٹی غا بکھ بکھ حصاں تے خاص طور رور سیاحتی جگہاں ور آیوش مراکز قائم کریں تانجے لوکاں بشکا ر این دوباں نانہ عام کیو جا سکے۔ اس دوران انہاں نے محکمہ نانہ مزید کہیو جے ویں اپنا تمام تر جاری کم کاج نانہ تا ولین مکمل کریں۔

Poonch Election

ضلع پونچھ با رے خرچہ نگران بھرت رام چندر اندھا لے نے پچھلے تہاڑے ضلع چناؤ آتھارٹی غی طرفوں خرچہ غی نگرانی با رے چایا گیا اقدامات غو جائزولیو، تانجے بھارتی چناؤ کمیشن غی طرفوں جاری رہنما خطوط غا نفاذ نانہ یقینی بنایو جا سکے۔ اس دوران انہاں نے انتخابات غے دوران سالمیت نانہ برقرار رکھن مانہ خرچہ غی نگرانی کرن آلی ٹیم غا اہم کردار نانہ اُجاگر کیو تے انہاں نے افسراں ور زور پایو جے وے آتھارٹی پیشہ وارانہ طریقہ سنگ اپنا اپنا فرض نانہ انجام دیں۔ جناب رام چندر نے سٹیٹک نگران ٹیم نانہ ہدایت جاری کی جے وے برگڈی غی تلاش کریں تے کوئی وی مشکوک نقدی مواد نانہ ضبط کریں۔

Udhampur Election

ضلع چناوی سیل اُدھم پور نے پچھلے تہاڑے ڈی سی دفتر تے ضلع غاعدالتی کمپلیکس مانہ ووٹراں غی تعلیم تے انتخابی شرکت پروگرام سویپ غے تحت جمہو ریت غو رنگ عنوان سنگ رنگولی بنان غی تقریب غو انعقاد کیو گیو۔ اس تقریب غے

دوران ضلع چناؤ افسر سلونی رائے مہمان خصوصی تھیں۔ تاہم اس پروگرام نانہہ منعقد کرن غو بنیا دی مقصد شہریاں تے خاص طور رور نوجواناں نانہہ تخلیقی انداز مانہہ شامل کرنوتھو، تانجے اُنہاں نانہہ ووٹ غا استعمال غی اہمیت با رے اُجاگر کیو جا سکے۔ شراکت داراں غا اس اجتماع سنگ خطاب کرتاں واں ضلع چناؤ افسر نے نوجواناں غی حوصلہ افزائی کی تے کہیو جے وے اپنا اہل خانہ، دوستاں، رشتہ داراں تے گوانڈیاں نانہہ عام اسمبلی چناؤ 2024 مانہہ جوش و خروش سنگ شرکت با رے راغب کریں۔

Real GDP India

موڈی ریٹنگ نے بھارت غی اصل جی ڈی پی مانہہ سال 2024 واسطے 7 عشریہ 2 فیصد غی مضبوط ترقی غی پیشنگوئی کی ہے۔ نیو یا رک مانہہ قائم عالمی درجہ بندی ایجنسی نے وی 2 ہزار 25 اپنی تخمینہ شرح 6 عشریہ 4 توں بدھا غے 6 عشریہ 6 کر دتی ہے۔ اس ضمن مانہہ موڈی ریٹنگ نے سخت مالیاتی پالیسی تے مالی استحکام غی کوششاں غے با وجود 2024 غا پہلا سہ ماہی مانہہ بھارت غی معیشت مانہہ سالوں سال 7 عشریہ 8 فیصد غا اضافہ با رے دسیو ہے۔

Inida China

بھارتی وزارتِ خارجہ نے دسیو ہے جے اصل قبضہ لکیر کو لے حالات غے چلتیں بھارت تے چین بشکار گل بات منعقد ہوئی ہے تے دوہاں مُلکاں نے مشترکہ طور رور فیصلو کیو ہے جے زمینی سطح ورا امن سکون نانہہ برقرار رکھیو جائے گو۔ اس ضمن مانہہ مزید دسیو گیو ہے جے بھارت چین سرحدی امور ورا مشاورتی اور مستقبل غا حوالہ سنگ تبادلہ خیال کیو گیو ہے۔ تاہم دوہاں فریقاں نے اپنا اختلافات نانہہ ختم کرن تے بقایا مسائل غا جلد حل تلاش کرن غی کوششاں ورا زور دتو۔ اس تیں علاوہ سفارتی تے فوجی ذرائع سنگ رابطو تیز کرن ورا وی سمجھوتو کیو گیو۔

اس غے نال ہی خبراں غو یوہ بلیٹن ختم ہوؤ۔